

Poet spricht: Trahit sua quenq; voluptas: einer treget lust vnd naigung zu disem/ ein anderer zu einem andern.

Wann ich aber disen oder andern studien vnd exercitien allen mit einander nachdencke/ so befinde ich kaum ein lustigere/ kurzweiligere vnd nutzlichere Kunst/ als eben erstbesagte/ so des Himmels Lauff antrifft: dann dardurch wirdt Gottes Allmacht vnd Wunderwerck am besten obseruirt vnd betrachtet.

Was ist auch wunderbarer/ als das die Sonn/ so doch ein natürlich Geschöpf ist/ die ganze Welt erfüllet/ wärmet/ erleuchtet vnd fruchtbar macht? Item das ander groß Licht/ der Mond/ so zu gewisser zeit ab vnd zunimbt/ dardurch sich alles vermehret.

Was ist ferners verwunderlichers/ als das durch die observationes der Sonnen/ des Mondes vnd anderer Stern lauffs/ Auf/ vnd Niedergangs/ der Menschen Natur vnd qualitet, item die zeit so wol bey Tag als bey Nacht kan erkundigt vnd ergründet werden: derowegen dises Studium vnd Kurzweil blüthlich allen andern fürzusehen.

Zu diser schönen Kunst nun/ insonderheit aber zu der Gnomonic vnd Sonnenuhrn/ habe ich von jugent auff auch ein sonderm lust vnd lieb getragen: vnd wann mir neben meinem ordentlichem Beruff zeit worden/ als ein angehender Liebhaber derselbigen/ allerley Stöck von Sonnenuhrn/ vnd andern Instrumenten/ insonderheit aber ein Quadranten zu meinem täglichen gebrauch gerissen: welchen etliche bey mir ersehen/ vnd desselben Abreissung (weiln Petri Apiani oder anderer Autorn nicht verhanden) von mir begeret.

Weiln es aber vertrieß/ vnd beschwerlich/ von freyer Hand solchen offte auffzureissen/ so hab ichs/ mir vnd andern zu güt/ zum Druck verfertiget/ vnd inn mangel des Apiani vnd anderer Gelehrten Teutscher Bücher vom Quadranten/ dis klein Tractelinn vom Gebrauch vnd nutzbarkeit desselben beschriben/ vnd allen Liebhabern diser Kunst zu gutem publicirn lassen wollen.

Nach dem aber heutiges Tags der Calumnianten vnd Lasterer vil/ welche auch wol das beste tadeln: als hab ich mir Ewer B. G. vnd N. zu angedentes Tractelins Patronen vnd Schirmherren erkoren/ vnder dero Schutz vnd Schirm es verhoffentlich wider alle Zoilos gnügsam wirdt verwaret sein.

Vnd